



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL**

**Komunikadu Imprensa
Semináriu Rejionál Munisípiu Baukau
02 Agostu 2021**

**JSMP realiza semináriu Rejionál iha Munisípiu Baukau;
Autór judisiáriu no Representante PN esplika sira nia funcionamentu serbisu
durante situasaun serka sanitária ba covid-19**

Iha 23 Jullu 2021, JSMP realiza semináriu rejionál iha Munisípiu Baukau kona-ba asegura akontabilidade Governu ba Covid-19, hadia asesu no liberdade ba informasaun iha Timor Leste, “Knaar Órgaun Seberanu, Partisipasaun Públiku iha Prosesu halo Lei no Asesu ba Justisa Formál Timor-Leste.”

Semináriu rejionál ne'e loke husi representante Prezidente Autoridade Munisípiu Baukau, Sr. Hermengildo R. Fraga. Iha abertura representante Prezidente Autoridade ne'e apresia tebes ho atividade ne'e no agradese tanba JSMP bele realiza semináriu ne'e ba autoridade lokál no grupu fetu sira, nune'e nia husu ba participante sira atu uza oportunidade ne'e ho di'ak hodi hato'o problema ne'ebé durante ne'e sira hasoru iha hala'o sira nia knaar no karik iha preokupasaun no dúvida, bele husu ka hato'o diretamente ba oradór sira.

Partisipante sira mai husi xefe suku, xefe aldeia no grupu fetu no membru comunidade husi suku haat mak hanesan, Suku Uma Ana Iku, Buruma, Trilolo no Buibau ho total partisipante hamutuk 39.

Oradór sira iha semináriu ne'e kompostu husi representante Parlamentu Nasionál mak deputada Elvina Soares de Carvalho, Juiza Tribunál Distrital Baukau Dra. Florença Maria Freitas, Xefi Prokuradór Distritál Baukau Dra. Remizia de Fátima da Silva, Coordenador Defensória Pública Distritál Baukau Dr. Grigoria de Lima no Sra. Ana Paula Marçal, Diretora Ezekutiva JSMP.

“JSMP agradese tebes ba oradór sira tanba bele fó tempu hodi fahe esperensia no esplika funcionamentu PN no sistema judisiáriu iha situasaun Covid-19 no responde direta partisipante sira nia preokupasaun no dúvida ne'ebé durante ne'e sira iha,” dehan Sra. Ana Paula Marçal, Diretora Ezekutiva JSMP.

Iha sesaun apresentasaun, deputada Elvina esplika katak Parlamentu Nasionál durante tempu serka sanitária continua mantein nia funcionamentu mezmuz tenke hamenus sira nia atividade balun hanesan hasoru eleitor sira no halo fiskalizasaun. Deputada ne'e mós esplika kona-ba povu nia direitu hato'o petisaun bainhira hasoru poblema ruma no deputadu sira iha dever atu hatan preokupasaun sira ne'e.

Iha setór justisa nian, Marítísima Juísa Florença apresenta kona-ba knaar tribunál nian ne'ebé iha kompeténsia tomak atu tési kazu hotu ne'ebé lori ba tribunál no durante ne'e tribunál kontinua fó prioridade ba kazu ho karater urjente mezmú iha situaun serka sanitária liuliu ba kazu sira iha faze primeiru interrogatóriu, arguidu prezu no ba kazu sivíl urjente sira henesan providénsia kautelár. Alende ne'e apresenta katak Tribunál Distritál Baukau iha ona mudansa lubuk ida inklui agora dadaun sira iha ona juís espesífiku ba kazu sivíl nune'e juís sira seluk bele foku ba kazu krime hodi bele alkansa prosesu sira ho lalais. Juísa ne'e mós sita kona-ba interdependénsia entre orgaun soberanu ne'ebé maski iha interdependénsia maibé la bele influénsia ba malu.

Iha apresentasaun ministériu públiku nian, Dra. Remizia de Fátima da Silva apresenta katak durante tempu serka sanitária sira kontinua hala'o sira nia knaar no konsege atende ona kazu hamutuk 200 resin, mezmú númeru ne'e menus uituan tuir sira nia tarjetu tanba parte sira barak labele mai ho razaun transporte públiku la la'o. Mezmú nune'e, ba kazu sira ne'ebé ho karatér urjente hanesan envolve prezu no primeiru interrogatóriu, ministériu públiku dala ruma fasilita transporte hodi ba foti parte sira hodi mai halo dilijénsia. Iha apresentasaun ne'e, xefe prokuradória distritál Baukau ne'e enfase liu papél MP nian iha hametin defeza ba labarik sira, ema ne'ebé laiha, no inkapasitadu sira. Alende ne'e hato'o mós ba iha partisipante sira katak prokuradór sira pruntu fó atendimentu iha oras 24.

Enkuantu oradór husi defensoria públiku, Dr. Grigorio de Lima apresenta katak defensoria públiku hala'o knaar hodi fó asisténsia ba iha arguidu sira ne'ebé hanesan mós ho advogadu sira maibé diferente maka defensoria públiku servi ho gratuita tanba Estadu mak selu. Asisténsia ne'ebé defensoria fó ba kazu hotu inklui halo mediasaun ba kazu sivíl hanesan divórsiu, regulasaun podér paternál no seluk tan. Durante tempu serka sanitária, defensoria públika kontinua fó asisténsia ba kazu hotu mezmú ho númeru ne'ebé ki'ik tanba situaun serka sanitária. Alende ne'e, kordenador defensoria públiku Baukau ne'e mós apresenta kona-ba ekipamentu ba apoiu administrasaun ne'ebé menus tebes durante tempu EE nune'e difikulta tebes serbisu defensoria públiku.

Parte seluk, Dra. Ana Paula Marçal, Diretora Ezekutiva JSMP hateten JSMP hala'o knaar hodi monitoriza tribunál no parlamentu nasional no deskobre katak iha duni progresu lubuk ida ne'ebé akontese ona, exemplu balun : PN sempre realiza plenaria no promove partisipasaun públiku (konsidera hanoin ka rekomendasaun sira). Entretantu tribunál, iha ona juís espesífiku ba kazu sivíl sira. Mezmú nune'e, sei nafatin iha dezafiu lubuk ida, exemplu iha parlamentu nasional, deputadu barak tama la tuir tempu (la pontual), deputadu balun ladun iha vontade di'ak bainhira halo diskusaun no to'o agora PN seidak iha planu legislativu Nasional. Enkuantu iha parte judisiáriu, liuliu iha instituisaun defensoria públika hasoru dezafiu sira mak hanesan menus facilidade no apoiu administrasaun (menus transporte, ekipamentu ba imprime no seluk tan). Alende ne'e, durante aplikasaun EE no serka sanitaria, kazu sira tun maka'as.

Iha sesaun diskusaun nian, partisipante sira foti kestaun kona-ba problema rai Estadu ne'ebé autóridade lokál balun uza ba interese privadu no balun abandona sira nia knaar

Rua Beco Lakateu, Aldeia Manu fuik, Suku Kolmera, Administrativu Vera Cruz

Munisípiu Dili, Timor-Leste
P.O Box : 275 . Tlp 3323883

Website: www.jsmp.tl no facebook: www.facebook.com/jsmp.timorleste

iha suku. Enkuantu iha parte judisiáriu nian, partisipante sira dúvida kona-ba problema abandona oan oinsá se parte sira la kumpri obrigasaun ba alimentasaun no solusaun ba kazu hadau malu rai ne'ebé uza sertifikadu rua, Indonezia no sertifikadu Timor nian bainhira lori ba tribunál.

Hatan ba kestaun sira ne'e deputada Elvina de Carvalho hatan katak problema rai ne'ebé privatiza tiha husi autoridade lokál, hatur loos ona iha lei katak rai Estadu na'in mak Estadu no bainhira atu uza tenke halo kontratu ho Estadu no kona-ba autóridade lokál ne'ebé abandona sira nia knaar, estrutura suku ka comunidade tenke informa ba administradór munisípiu hanesan autoridade lokál sira nia superiór. Enkuantu Juisa Florença esklaresese liutan katak rai Estadu sira ne'ebé mai husi reliqia Portuges, Indonesia hotu-hotu entrega ba Estadu Timor maibé problema mak dalaruma iha *oknum* balun mak konsidera nia an mak na'in fali ba rai Estadu no fó kontratu ba ema seluk. Nia mós apela ba partisipante sira, bainhira iha problema kona-ba rai bele keixa ba iha tribunál.

Parte seluk kona-ba kazu abandona oan, Dra. Remizia de Fátima hateten bainhira iha kazu sira hanesan ne'e tenke lori ba iha polísia hodi entrega ba iha ministeriu públiku ka bele direta ba iha ministériu públiku hodi hahú prosesu ba iha asaun sivíl kona-ba regulasaun podér paternál no bainhira parte ida la kumpri sei kriminaliza tuir artigu iha Kódigu Penál kona-ba la halotuir obrigasaun alimentár.

Depoizde apresentasaun materia no hatan preokupasaun partisipante sira, ekipa JSMP akompana partisipante balun vizita ba iha Tribunál no Prokuradoria. Partisipante sira agradese tebes tanba hetan oportunidade hodi direktamente haree no rona esplikasaun kona-ba serbisu sira no mekanizmu atendimentu husi instituisaun rua ne'e.

Semináriu rejionál ne'e, realiza ho fundus husi União Europeia, parseiru suporta husi CEPAD no semináriu ne'e realiza husi JSMP.

Atu hetan informasaun liután bele kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefone: 3323882 | 77040735
Website: <https://jsmp.tl/>

Rua Beco Lakateu, Aldeia Manu fuik, Suku Kolmera, Administrativu Vera Cruz
Munisípiu Dili, Timor-Leste
P.O Box ; 275 . Tlp 3323883

Website: www.jsmp.tl no facebook: www.facebook.com/jsmp.timorleste